

# Beyesa Bèrdadero

Nos Kreador a bendishoná e ser femenino ku bunitesa físiko. Ku frekuensia, eventonan ta organisá pa selektá “Miss” esaki òf “Miss” esei...asta pa chikitinnan! Riba esei, e sertámen di “Miss Universe” i e bishita di kandidatanan pa “Miss Aruba” ta revelá ku nos ta haña beyesa femenino sumamente importante. Ma tin siertu peliger relashoná ku beyesa ku ta bon pa nos kòrda.

1) E peliger di igualá bunitesa ku importansia i balor. Kisas, fo’i chikitu, hende a papia di su bunitesa. Awor, ku e kurpa a desaroyá, tur dia tin komentario i mensahe no-verbal tokante su bunitesa. E ta gosa atenshon di hende hòmer i mucha muhénan ta yalurs. E ta haña trato preferensial na skol i trabou pa motibu di su bunitesa. Su aparsia físiko ta hasié popular. No ta strañu ku un beyesa ta konkluí ku su balor ta mará na su bunitesa.

Ma esei ta un konklushon kiboká. Hopi yùfrou ta ekskluí di partisipá den un sertámen di beyesa. Kisas nan koló no ta “bon”, òf ta nan kabei, òf sierto “defekto”. Solamente esnan ku ta “bunita” tin chèns di bira kandidata pa e sertámen. **Esei ke men ku mayoria dama no ta importante. Absolutamente nò!**

Tur hende a wòrdu kreá den e imágen di Dios (Gènesis 1:26-27) i pesei kada persona tin balor i importansia p’E. Hesus a muri riba krus pa TUR hende; no solamente pa beyesanan. **Ta tristu ora un persona tin balor solamente pa motibu di su aparsia. Serka Dios, tur hende tin balor**, apesar di nan koló, kabei, defekto i aparsia.

2) E peliger di orguyo. Hopi beyesa ta invertí oranan dilanti spil pa peña, pinta kara, usa máskara, lepstek, puiro, èts. Ta fásil p’è kuminsá pensa ku su bunitesa ta un produkto di su propio esfuerso. Ma esei tambe ta mentira.

Ningun persona por yuda ki koló, kabei òf aparsia e ta nase kun’è. **Dios** ta determiná esei. Òn Korintionan 4:7 ta hasi algun pregunta apropiá: “*Kiko bo tin ku bo no a risibi? Ma si bo a risibi’è, pakiko bo ta gaba komo si fuera bo no a risibi’è?*”. Dios a krea e beyesa. Si bo tin bunita kurpa, kara, i kabei, kòrda ku esei ta un regalo ku Dios a duná bo, **no un regalo ku bo a meresé.** Ku umildat, gradisí Dios pa Su bendishon.

3) E peliger di konsentrá riba loke ta transitorio na lugá di loke ta duradero. Bunitesa físiko ta dura algun aña so. Mayoria “Miss \_\_\_\_\_” tin entre 17 pa 25 aña di edat. Ma ningun beyesa tin chèns pa gana ku 40 aña! E bunitesa no t’ei manera antes.

Trabounan ku ta eksigí bunitesa, manera modelahe, no por bira un karera. Ploinan i kabei blanku ta kuminsá aparesé. I tragedianan sa sosodé. Un beyesa por hañ’è den un aksidente, òf kandela, òf wòrdu paralisá. Den un instante kruel e bunitesa ku e yùfrou a dependé di dje pa su balor propio, a desaparecé, lagando e sikológikamente kibrá! Bunitesa físiko ta temporal.

Kiko ta duradero? Bunitesa spiritual i di karakter, esta **bunitesa di paden.** Palabra di Dios ta konsehá: “*No laga boso dòrnamentu ta di pafó so...ma lagu’è ta e persona skondí di e kurason...lokual ta presioso den bista di Dios*” (1 Pedro 3:3-4). “*Ser atraktivo ta engañoso i bunitesa ta banidat, ma un muhé ku ta teme SEÑOR, esei lo wòrdu elogiá*” (Proverbionan 31:30).

Ningun di nos por yuda kon nos ta parse. **Ma nos tur por desaroyá bunitesa interno.** Nos tur konosé “hende bunita”, ku karakter mashá mahos. Di otro banda, tin hende ku no ta mashá agradabel pa bista, ku tin un bunitesa di paden.

Ta e bunitesa paden ku Dios ke pa tur hende di ámbos sekso desaroyá. “*No wak su apariensia...pasobra Dios no ta mira manera hende ta mira, pasobra hende ta wak apariensia di pafó, ma SEÑOR ta wak kurason*” (1 Samuel 16:7).

Dios por transformá bo bida ora bo bin serka Kristo pa salbashon. Ma despues, bo tambe tin ku lucha ku poder di Dios pa desaroyá bunitesa interno. Esei ta beyesa berdadero!